

e da orde social, elevaranse en cinco puntos as porcentaxes de deducción establecidas con carácter xeral na Lei 49/2002, do 23 de decembro, de réxime fiscal das entidades sen fins lucrativos e dos incentivos fiscais ó mecenado, en relación cos programas e coas actividades que se realicen para tal acontecemento ata o final do período da súa vixencia.

2. De acordo co previsto no punto seis da disposición adicional segunda da Lei 53/2002, do 30 de decembro, de medidas fiscais, administrativas e da orde social, as entidades e institucións ás que se refire o punto anterior expedirán, en favor dos achegantes, as certificacións xustificativas previstas no artigo 24 da Lei 49/2002, do 23 de decembro, de réxime fiscal das entidades sen fins lucrativos e dos incentivos fiscais ó mecenado, e remitiranlle ó Consello Xacobeo, dentro dos dous meses seguintes á finalización de cada exercicio, unha relación das actividades financiadas con cargo ás ditas achegas, así como copia das certificacións expedidas.

3. O Consello Xacobeo remitiralle copia das certificacións recibidas, dentro dos dous meses seguintes á súa recepción, á Axencia Estatal de Administración Tributaria.

Disposición transitoria única. *Investimentos realizados antes da entrada en vigor deste real decreto.*

1. Cando os investimentos a que se refire o punto dous.1.c) da disposición adicional segunda da Lei 53/2002, do 30 de decembro, de medidas fiscais, administrativas e da orde social, fosen realizados entre o 1 de xaneiro de 2003 e a data de entrada en vigor deste real decreto, a aprobación e cualificación do Consello Xacobeo á que se refire o artigo 3 deste real decreto incorporárase á certificación acreditativa emitida de acordo co establecido no artigo 8.

2. Cando as transmisións patrimoniais ás que lles sexa de aplicación a bonificación prevista no punto catro da disposición adicional segunda da Lei 53/2002, do 30 de decembro, de medidas fiscais, administrativas e da orde social, fosen realizadas entre o 1 de xaneiro de 2003 e a data de entrada en vigor deste real decreto, e o suxeito pasivo non aplicase a dita bonificación na declaración-liquidación presentada, poderase solicitar a correspondente devolución de ingresos indebidos desde o momento en que concorran os requisitos que establece o artigo 7.2 deste real decreto para a aplicación da mencionada bonificación.

Disposición derradeira primeira. *Réximes tributarios forais.*

O previsto neste real decreto enténdese sen prexuízo dos réximes tributarios forais de concerto e convenio económico en vigor, respectivamente, nos territorios históricos do País Vasco e na Comunidade Foral de Navarra.

Disposición derradeira segunda. *Entrada en vigor e ámbito de aplicación temporal.*

1. Este real decreto entrará en vigor o día seguinte ó da súa publicación no «Boletín Oficial del Estado» e resultará aplicable ós investimentos, ás operacións e ás actividades realizadas a partir do 1 de xaneiro de 2003 que cumpran os requisitos previstos na disposición adicional segunda da Lei 53/2002, do 30 de decembro, de medidas fiscais, administrativas e da orde social, e nesta norma.

2. Este real decreto cesará na súa vixencia o 31 de decembro de 2004, excepto os artigos referentes

ás obrigas de emisión e remisión de certificados, que cesarán cando se ultime o seu cumprimento.

Dado en Madrid, o 11 de xullo de 2003.

JUAN CARLOS R.

O ministro do Facenda,
CRISTÓBAL MONTORO ROMERO

MINISTERIO DA PRESIDENCIA

15240 *REAL DECRETO 946/2003, do 18 de xullo, polo que se establecen requisitos específicos de etiquetaxe para o espárrago branco en conserva.* («BOE» 181, do 30-7-2003.)

O Real decreto 1334/1999, do 31 de xullo, polo que se aproba a Norma xeral de etiquetaxe, presentación e publicidade dos produtos alimenticios, establece os requisitos obrigatorios que deben figurar nas etiquetas con obxecto de informa-lo consumidor sobre as características dos produtos alimenticios. A dita norma incorporou ó ordenamento xurídico interno a normativa comunitaria vixente nese momento, que posteriormente foi codificada mediante a Directiva 2000/13/CE, do Parlamento Europeo e do Consello, do 20 de marzo de 2000, relativa á aproximación das lexislacións dos estados membros en materia de etiquetaxe, presentación e publicidade dos produtos alimenticios.

Así mesmo, segundo os principios xerais da citada norma aplicables á etiquetaxe, as modalidades segundo as cales se realice esta etiquetaxe non deberán inducir a confusión ó comprador sobre a natureza, identidade, calidades, composición, cantidade, duración, orixe ou procedencia e modo de fabricación ou de obtención.

A experiencia acumulada aconsella acomoda-las prácticas comerciais ó espírito da normativa existente, para evitar que determinados produtos gocen da fama doutros similares, aproveitando a circunstancia de que unha interpretación ampla da lexislación lles conceda determinadas vantaxes no mercado.

Con esta perspectiva, e de acordo co artigo 13 do citado real decreto, parece conveniente completa-las normas sobre etiquetaxe de espárrago envasado, no que se refire á indicación da orixe e procedencia do produto.

Este real decreto dítase ó abeiro do disposto no artigo 149.1.13.^a da Constitución, que lle atribúe ó Estado a competencia exclusiva sobre bases e coordinación da planificación xeral da actividade económica.

Para a súa elaboración foron consultadas as comunidades autónomas así como representantes do sector afectado, e emitiu informe preceptivo a Comisión Interministerial para a Ordenación Alimentaria.

Este real decreto, en fase de proxecto, foi sometido ó procedemento previsto no artigo 19 da directiva 2000/13/CE do Parlamento Europeo e do Consello, do 20 de marzo de 2000, relativo á aproximación das lexislacións dos estados membros en materia de etiquetaxe, presentación e publicidade dos produtos alimenticios.

Na súa virtude, por proposta do vicepresidente segundo do Goberno para Asuntos Económicos e ministro de Economía, do ministro de Agricultura, Pesca e Alimentación e da ministra de Sanidade e Consumo, de acordo co Consello de Estado e logo de deliberación do Consello de Ministros na súa reunión do día 18 de xullo de 2003,

DISPOÑO:

Artigo 1. *Obxecto.*

Este real decreto ten como obxecto dictar normas complementarias para a etiquetaxe de espárrago branco, segundo o previsto no artigo 13 do Real decreto 1334/1999, do 31 de xullo, polo que se aproba a Norma xeral de etiquetaxe, presentación e publicidade dos produtos alimenticios.

Artigo 2. *Etiquetaxe.*

O espárrago branco envasado para a súa comercialización en España deberá levar na etiqueta, con caracteres tipográficos iguais cós do nome, a razón social ou a denominación utilizados na identificación da empresa, e no mesmo campo e ángulo visual, a seguinte lenda:

a) No caso de produtos orixenarios de España, a expresión «produto cultivado en (provincia, comunidade autónoma)».

b) No caso de produto orixenario de Unión Europea, unha indicación coa expresión «produto orixenario de (Estado membro no que se cultivou o produto)».

c) No caso de produtos orixenarios de países terceiros, a expresión «produto orixenario de (país terceiro no que se cultivou o produto)».

Ademais, cando o produto se envasase en España, no envase deberá figura-lo número de rexistro sanitario correspondente á fábrica na que se elaborase o produto. A dita indicación aparecerá acuñada se o envase é metálico, e impreso con tinta indeleble, antes da esterilización, se é de vidro.

Artigo 3. *Réxime sancionador.*

O incumprimento do establecido nesta disposición será sancionado de conformidade co establecido no Real decreto 1945/1983, do 22 de xuño, polo que se regulan as infraccións e sancións en materia de defensa do consumidor e da produción agroalimentaria.

Disposición transitoria única. *Comercialización de existencias de produtos.*

Os produtos envasados e etiquetados antes da entrada en vigor deste real decreto poderán comercializarse ata que se esgoten as súas existencias.

Disposición derradeira primeira. *Título competencial.*

Este real decreto dítase ó abeiro do disposto no artigo 149.1.13.^a da Constitución, que lle atribúe ó Estado a competencia exclusiva sobre bases e coordinación da planificación xeral da actividade económica.

Disposición derradeira segunda. *Entrada en vigor.*

Este real decreto entrará en vigor ós 30 días da súa publicación no «Boletín Oficial del Estado».

Dado en Palma de Mallorca, o 18 de xullo de 2003.

JUAN CARLOS R.

O vicepresidente primeiro do Goberno
e ministro da Presidencia,
MARIANO RAJOY BREY